

BONERIANO

hanchu pa abo
smal pa mi ta lei di
trèktòr

EDITOR:
Bonaire Communication Services N.V.

Djasabra 12 Ougùstùs 2023 | Preis: \$1.25

HOPI INFRAKSHON DI TRÁFIKO

Miss Petite & Preteen Hispanoamerica 2023 a yega Boneiru



Kaylee Winklar i Irlenska Martinus a regresá Boneiru djabièrnè 11 di ougùstùs den oranan di mèrdia. E dos hóbennan a bai ku e títulonnan máksimo di Miss Preteen i Miss Petite Hispanoamerica 2023. BIATA Foundation, bou di mando di Jhonrick Anthony, ta wak bèk satisfecho riba prestashon i logro di e kandidatanan. Diputado Jolinda Craane tambe tabata presente pa risibí e reinanan.

CHANGAN AUTO

CS55 PLUS

f /dabboussimotors

Píldora ku mata kanser kla pa tèst den ser humano

PAG 6

Solamente hende nasé 'muhé' por partisipá den Miss Universo Italia

PAG 4

PA TUR BO
PIESA I TIRE
PA BO AUTO,
BUS OF TRUCK

KAYA CARLOS A. NICOLAAS | 717-6272

\$10 FREE SLOT PLAY

Sign up for your FREE Player's Card and receive \$10 in FREE Slot Play!

Open Monday - Saturday 8pm to 4am | Sunday 7pm to 3am | (599) 717-3504
diviflamingocasino.com | ATM available

xerox™

OBERSI
ELECTRONICS
BONAIRE

Miss Preteen i Petite a yega Boneiru

K R A L E N D I J K - Djabièrnè 11 di ougùstus, un fecha históriko pa Boneiru, yegada di MISS PRETEEN & MISS PETITE ku nan a bai kuné for di e sertámen di Miss and Mister Hispanoamerica Internacional na Repùblika Dominikana. Miss Pre Teen a bai pa Kaylee Winklar i Miss Petite Irlenska Martinus

Na nan yegada diputado Jolinda Craane a entrega ámbos un bòshi di flor i a bisa: “Nos tin ku konsiderá e kosnan aki, pasobra ta kos ku ta saka e bandera di Boneiru den publisidat. Mi ta kere tin diferente aktividat, ku ta yuda pa e hende di Boneiru, bai saka kara den eksterior. Mi ta kontentu ku e logro di e misnan.” Johnrick Anthony kende ta

presidente di BIATA Fundatio

“Nos a traha hopi duru, bon preparashon, hopi kos a pasa pero nos a logra. Nos a bai komo Boneiru. Hopi disiplina a pone ku Boneiru a logra. Kada bía ku nos bai den eksterior, mi ta eksperensia kosnan nobo ku ta yuda den e mundu di beyesa pa mas logro. Pabi en Boneiru.”



Pronóstiko di tempu pa Boneiru

Djabièrnè 11 te Djasabra 12 Ougùstus 2023
Periodo ku solo i mañan chens pa algun áwaseru

Tin periodo ku solo, mañan por tin algun áwaseru. E temperatura máksimo lo ta aproksimadamente 33°C, e temperatura mínimo mas o ménos 28°C. E bientu ost ta moderá te basta fuerte, forsa 4-5.

Altura di ola: aproksimadamente 1.5-2.0 m (5-7 pia)

* Altura di ola válido pa laman grandi

Bonaire Krant
UW EILAND, UW KRANT!

HOPI INFRAKSHON DI TRÁFIKO

KRALENDIJK- Ape- sar ku outoridatnan ta keda enfatisá ku kada usuario di nos kareteranan ta, respon- sabel pa un tráfiiko sigur. No opstante esaki por nota riba base regular kon per- sonanan ta faya ku reglanan di tráfiiko. Durante e últi- mo kuater dianan Kuerpo Polisial Hulanda Karibense (KPCN) a registrá vários Infrafrakshon.

Riba djaweps 10 di ougùstùs, banda di 2.30 or di mardugá, un ‘Hit & Run’ a tuma lugá riba Kaya Lib- ertador Simon Bolivar. Un outo ku a sali for di e sitio di stashoná outo di Jong Bonaire i lora banda robes den direkshon prohibí, a dal den un outo ku a sali for di Kaya Hermandad i lora na banda drechi pa subi Kaya Libertador Simon Boli- var. E shofùr di e outo ku a okashoná e aksidente, a sigui kore bai. Ta investi- gando e kaso.

Den oranan lat di atardi riba djáragon 9 di ougùstùs a tene un kòntrol di tráfiiko planiá riba Kaminda Dja- bou. E kòntrol tabata dirigí riba kore ku un plachi di number na e bùmper dilanti di un outo. Aki un total di 13 shofùr a haña un prosès- ferbal pa motibu ku nan no tabatin e plachi di number pegá dilanti riba e outo i no tabatin esaki huntu ku nan. E shofùrnan ku si tabatin e plachi di number huntu ku nan, a pega esaki ku tairèp parti dilanti di e outo.

Riba djamars 8 di ougùstùs a detené un hòm- ber di inisial J.A.J. di 26 aña di edat pa maltrato. Riba 29 di yùli, e sospechoso tabata den diskushon ku un otro

hòmber. Na momentu ku e víktima tabata bandoná e sitio, e sospechoso a push’é for di un baikel di kua el a kai i resultá heridá. Inves- tighashon den e kaso ta an- dando.

Riba djamars 8 di ougùstùs, alrededor di 1 or di mèrdia, un aksidente ku un skuter a tuma lugá riba Kaya Internashonal. E shofùr a trata den un bògt pa desviá pa algun buraku riba kaminda di kua el a bai resultá riba e banda kontrali nèt na momentu ku un ve- híkulo tabata aserkando. Pa e motibu aki el a spanta i a pèrdè kòntrol. Finalmente el a resultá den mondi kan- tu di kaminda. Ambulans a transportá e dama shofùr pa hòspital pa tratamentu mé- diko.

Den oranan di mardugá riba djamars 8 di ougùstùs, un aksidente ku un skuter a tuma lugá riba Bulevar Ju- lio A. Abraham. Pa motibu- nan deskonosí, shofùr di un skuter a kai i resultá heridá. Ambulans a transportá e dama shofùr pa hòspital pa tratamentu médiko. A bai ku e skuter warda di polis i e doño por pasa buska esaki na momentu ku por mostra un reibeweis bálido i un prueba di seguro bálido.

Alrededor di 9 or di mainta, riba djamars 8 di ougùstùs, ‘meldkamer’ sentral a haña notifikashon tokante un aksidente entre tres outo ku a tuma lugá na e krusada T di Kaya Am- sterdam i Kaminda Djabou. Un pikòp(1) a bai dal den un outo di famia(2). Despu- es di e impakto e outo di famia a kèntel riba su

banda riba un otro outo(3). Pa e motibu aki e shofùr i su pasahero no por a sali for di e vehíkulo. P’esei a pidi presensia di brantwer i a sera e kaya un ratu pa e partnernan di kadena por a hasi nan trabou. Ambulans a transportá ámbos víktima pa hòspital pa tratamentu médiko.


Den oranan trempan di mainta riba djamars 8 di ougùstùs un aksidente a tuma lugá riba Kaya Papa Cornes. Shofùr di un pikòp a deklará ku el a desviá pa

un kachó i a dal den un palu di lus. E shofùr a resultá heridá i personal di ambu- lans a trat’e na e sitio mes.

Den oranan di mar- dugá riba djabièrnè 11 di ougùstùs, a detené un dama di inisial P.v.d.M. na altura di Plaza Wilhelmina pa manehá bou di influensia di alkohòl. E sospechoso a dal ku su outo den dos piòn di betòn. Despues di kòntrol mas aleu a hasi un tèst di supla kuné i a konsekuen- sia di e resultado, a detené i hib’é warda di polis pa un

análisis di rosea. A bai ku e outo warda di polis i a kon- fiská su reibeweis.

Riba djadumingu 6 di ougùstùs a detené un hòm- ber di inisial J.R.T.H di 64 aña di edat na Kaya Calixta pa manehá bou di influen- sia di alkohòl. Despues ku ‘meldkamer’ sentral a haña un notifikashon, un pa- truya a bai na e sitio. E so- spechoso tabata drumí den e vehíkulo ku lus sendé, mei mei riba kaminda. Na momentu ku agentenan a aserk’é, a sinti mesora holó di alkohòl. Ademas e tabata papia ku lenga pisá. A de- tené i a hib’é warda di polis pa hasi un análisis di rosea. A hiba e outo tambe warda di polis. Tur kos ta indiká ku KPCN no ta hasi wega ku siguridat den tráfiiko. Kònt- ròlnan di tráfiiko ta sosedé riba un base regular. Den e dianan tras di lomba a duna diferente prosèsferbal pa manehá sin dokumentunan di Seguro bálido, sin reibe- weis bálido, pa tene telefòn den man miéntras ta mane- há i pa manehá sin faha di seguridat i sin hèlm bisti.



OPTENIBEL NA

Kuranderia popular

Natural i spiritual

Un proyekto di Unesco i FuHiKuBo

Ofisina di FuHiKuBo

Ofisina di Extra

Del Mar BV

\$17,50

Bakery minimarket la tres maria
ta buska

-2 Bakker

Pa mas informashon yama na telefòn

701-1305

Solamente hende nasé 'muhé' por partisipá den Miss Universo Italia

K R A L E N D I J K /
ORANJESTAD E organisashon di Miss Universe Pageant ku un tempu tabata propiedat di èks Presidente Merikano, Donald Trump, ta sigui pasa den kontroversianan ku ta halando hopi atenshon den vários pais rònt mundu. Hulanda resientemente a sakudí mundu kompleto na momento ku Miss Universe Holland

Rikkie Valerie Kolle di 22 aña, a bira e promé transgénero ku a logra korona den un evento di beyesa. Un desishon ku a hala atenshon di henter mundu i ku a haña kritiká, pero na mes momento aploudí pa e echo ku un persona ku a nase maskulino, a transformá su mes i bira un hende muhé. E situashon na Hulanda a pone vários di e or-

ganisashonnan nashonal di vários pais di Miss Universo, aktua mesora i tuma un desishon riba e fenómeno aki.

Italia

E organisashon Italiano tabata un di e promé na Europa ku mesora a tuma un desishon kambando su reglanan pa partisipashon. Tur kandidato tin

ku inskribí pa e konkurso di beyesa, mester ta un hende ku a nase komo hende muhé. Ku otro palabra no ta permití transgénero partisipá den e evento di Miss Universo Italia. E desishon a lanta hopi krítika den e pais ku a pone ku vários grupo a anunsiá ku nan lo bai inskribí kandidatonan ku ta transgénero pa partisipá den e evento nashonal aki.

Indonesia

Na Indonesia e kos a bai mas leu. Outoridatnan hudisial a inisiá un investigashon penal despues ku vários kandidata ku a yega di partisipá na e evento, a denuncia ku a someté nan na abuso di aktonan seksual denigrante violando nan derecho di respèt komo hende. Un di e akusashonnan mas serio ta e echo ku tin di e kandidatanan ku a

partisipá na Miss Universo Indonesia, ta muestra ku a obligá nan aparesé dilanti di un komishon di kontrol ku mester a kontrolá kualkier tipo di kos straño na kurpa di e kandidatanan i ku nan mester a aparesé solamente ku karson djabou i pechu afó. A kontrolá tambe si e hóbennan tabatin muchu selulitis. Fuera di esaki tin algun kandidata ku a entrega keho ku asta a pidi pa den nan karson djabou i ku pechu afó, nan mester a para tambe pia habri. Segun Miss Universe Indonesia saliente Maria Harfanti, ta normal ku pa e evento ta hasi loke ta yama "bodychecks" pero ku nunca den e aña ku el a partisipá, a solisitá na e grupo di partisipantenan ku nan tin ku kita nan paña. E di 73 edishon di Miss Universo, lo tuma lugá e aña aki na El Salvador



Pa aña eskolar nobo

ACE Foundation ta introdusí 'ACE Tweens Club'

K R A L E N D I J K -- ACE Foundation ta introdusí 'ACE Tweens Club', kual ta konsistí di hóbennan entre 10 pa 15 aña. E hóbennan akí ta bai ta aktivo durante henter aña, partisipando den diferente proyekto i aktividatnan ku tin komo meta pa laga hóbennan demostrá i desaroyá nan talentonan artístiko i tambe nan edukashon kultural.

Biniendo huntu 3 biá pa siman, e hóbennan ta haña oportunitat pa praktiká i desaroyá nan pashon pa medio di lèsnan ku nan ta risibí serka diferente coach di dis-

iplinanan manera baile, músika, aktuashon, arte visual i muchu mas. Tambe durante aña nan ta risibí diferente tayer ku tambe ta aña di nan konosementu general.

Aktualmente 'ACE Tweens Club' a kaba di habri e inskripshon nobo pa e aña eskolar di 2023/2024, ku espasio pa un total di 15 hóbennan di edat di entre 10 pa 15 aña. Inskripshon ta habri te ku dia 25 di ougùstùs pa ranka sali mesora ku e promé enkuentro ku mayor dia 28 di ougùstùs i pa dia 1 di sèptèmber ta ranka sali ku e promé lèsnan.

E promé proyekto pa 'ACE Tweens Club' ta 'ACE-WOOD'. E meta ku e proyekto ta pa konsientisá e hóbennan riba e importansia di responsabilidad, fokùs, determinashon i disciplina i tambe tur loke ta nesario pa nan por yega na éksito.

Pa inskribí òf pa mas informashon, tuma kontakto ku ACE Foundation via di number di telefòn +599790-0155, Facebook ACE Bonaire, òf e-mail acesbonaire@gmail.com. Ta tuma inskripshon for di awor te 25 di ougùstùs.



Raymari B.V

ta buska

-2 metselaar

-1 timmerman

Mas info yama na **telefon 782-0119**

Roheco N.V.

ta buska

-2 wegenbouw arbeider

Pa mas informashon yama na telefòn

796-3008

Indebon ta pidi koperashon ku uso di 'waf flotante'

KRALENDIJK – Instituto Deportivo Indebon ta trahando duru riba e waf flotante (floating pier) den laman na altura di Parke Tului. Pa sòru ku tur hende por gosa na un manera seif i yen di plaser di e pir, kordialmente Indebon ta konselhá pueblo di Boneiru pa respetá e siguiente reglanan.

Públiko

Waf Flotante ta aksesibel pa tur hende i tur hende

ta permiti pa hasi uso di dje. Mucha bou di 15 aña por hasi uso di e waf bou di guia di un persona adulto. Subimentu riba waf ta riba riesgo di kada siudadano. Indebon/STINAPA no ta para responsabel pa kualke daño òf aksidente.

Piskamentu

Ta prohibí pa piska riba e waf ku kualke opheto òf artefakto ku por uza pa piska kuné. Esaki ta relashoná ku higiena, siguridat di lan-

dadónan i usarionan.

Shushi

Mester depositá tur shushi den e bakinan di shushi ku ta destiná pa esaki i pues no riba e waf òf den laman.

Bestia di kas

No ta permiti pa bai ku bestia (di kas) riba e waf. Esaki ta relashoná ku higiena, siguridat di landadónan i usarionan;

Ta prohibí pa huma òf

usa alkohòl i/òf droga riba e waf i no ta permiti pa mara boto na e waf òf krea peliger pa medio di pasa muchu duru òf muchu pegá ku e waf ora ta kore boto.

Emergensia

Den kaso di peliger direkto, yama e siguiente numbertan di emergen-

sia: Polis (911), Ambulans (912), Warda kosta (913), Kuerpo di bombero (919), Tanki di dekomprashon (133) i Stinapa: +599 6778 444 (number di pikèt al-kansabel for di 06:00 or – 21:00 or). Pa informashon òf reservashon, yama Indebon na +599 715 5319.



Algun konseho pa aliviá kalor

Kalor eksesivo Evitá problema di salú

<p>Bebe mas awa</p> <ul style="list-style-type: none"> Asta si bo no tin set Kòfi i té tambe por Evitá alkohòl i bibida ku suku 	<p>Bisti paña fresku</p> <ul style="list-style-type: none"> Usa tela di katuno òf lino Den solo: usa paña koló kla, pèchi òf sombre 	<p>Freska kurpa</p> <ul style="list-style-type: none"> Uza awa fresku Muha man/brasa/kara (ku paña muhá) Hinka pia den kònchi di awa
<p>Move ora ta fresku</p> <ul style="list-style-type: none"> Mainta trempañ, atardi òf anochi Ta konta tambe pa trabou na kas Adaptá intensidat di ehersisio Buska sombra mas tantu posibel 	<p>Tene kas fresku</p> <ul style="list-style-type: none"> Tapa bentana pa solo Usa fèn òf arko Hilari kas ora patá ta fresku Evitá husa aparato ku ta produsí kayente 	<p>Si den kas ta kalor</p> <ul style="list-style-type: none"> Bai den kura den fresku (balcon, palapa, parasol) Bai un lugá publiko fresku (pató òf paden)
<p>Protehá kontra solo</p> <ul style="list-style-type: none"> Keda den sombra entre 11or pa 3or Bisti brel di solo Usa parapiu Usa krema kontra solo ku un di minimo SPF50 	<p>Remedi i kalor</p> <ul style="list-style-type: none"> Puntra botika kon pa warda remedi ora ta kalor Evitá husa aparato ku ta produsí di remedi 	<p>Kuida otro</p> <ul style="list-style-type: none"> Yuda mucha chikí, hende grandi, hende ku desabilitat i malesa kronik Pasa bisitá òf yama regularmente

Huisartsenpost Bonaire ta introdusí fail elektróniko nobo

KRALENDIJK -- Na Huisartsenpost tur e klínikanan di dòkter di kas di Boneiru ta traha huntu. E sentro ta ofresé den oranan di anochi i den wikènt, kuido di urgensia na momento ku propio klínika di dòkter di kas ta será. Ku introdukshon di e fail elektróniko nobo, Huisartsenpost Bonaire ta kumpli ku e nesesidat ku tin pa un kuido di salubridat integrá i efisiente.

E fail elektróniko nobo Huisartsenpost ta konektá ku e fail elektróniko ku ta usa kaba na e klínika di dòkternan di kas.

Ku e sistema nobo akí e empleado na warda por tin aksesio na informashon médiko importante di propio dòkter di

kas, manera dato di remedi, alergía, resultado, komunikado for di hòspital. Esaki ta fasilidat e dòkter di kas na warda pa duna e mihó tratamentu posibel na e pashèntnan ku ta bishitá Huisartsenpost.

E fail elektróniko di pashènt ta ofresé un plataforma sentral kaminda ta registrá tur informashon médiko relevante na un sistema seif i organisá.

Huisartsenpost Bonaire ta enfatisá ku tin rekisitonan severo di privasidat vigente pa e sistema nobo i pa e empleadonan ku ta traha ku e sistema. Protekshon di dato personal di pashènt tin e prioridat di mas haltu. E fail elektróniko di pashènt ta kumpli ku tur

rekisito legal i ta hasi uso di teknologia di vigilansia avansá pa evitá entrada no outorisá na e datonan.

Empleadonan di Huisartsenpost a sigui kurso spesífiko tokante privasidat i a firma un deklarashon. Den kaso ku tin reserva ku e entrada na fail médiko na dòkter di kas, òf ku tin pregunta tokante e sistema, ta invitá gustosamente pa tuma kontakto via info@pccarib.com. E empleadonan ta pará kla pa kontestá pregunta.

Ku e fail elektróniko nobo, Huisartsenpost ta sigui enfatisá pa mehorá kalidat di kuido na benefisio di e pueblo Boneriano.

Kehonan di kalor

- Deshidratá**
- Boka òf lep seku
 - Uriná tiki
 - Suf òf slap
 - Brasa òf pia friu

Temperatura di kurpa ta kuminsá subi

- Hopi kansá
- Problema ku konsentrashon
- Dolò òf biramentu di kabes
- Kram di muskulo
- Iritashon di kuero
- Pia hinchá
- Soda hopi
- Kurason ta bati lihé
- Kolò di kueru blek
- Kai flou

Temperatura di kurpa a subi 39 grado

- (Gana di) saka
- Kueru kòrà sin sodó
- Kurason ta bati lihé
- Steipi
- Pèrde konosementu

Kiko pa hasi

1. Bebe sufisiente awa, té òf kòfi, asta si bo no tin set
2. Bai den sombra
3. Hasi trunkil
4. Si no tin mehorashon: yama dòkter di kas

1. Stòp lokuál bo ta hasiendo
2. Bai den sombra
3. Bebe awa òf bibida di spòrt
4. Freska kurpa: pia den kònchi di awa, baña òf pasa paña muhá na kurpa
5. Si no tin mehorashon: yama dòkter di kas

1. **YAMA AMBULANS: 912**
2. Bai den sombra: preferibel kaminda tin fèn òf érko
3. Fria kurpa: spuit awa riba e kurpa òf pone paña muhá i friu na kurpa
4. NO duna nada di bebe

Despues di 20 aña

Píldora ku mata kanser kla pa tèst den ser humano

KRALENDIJK – Un píldora ku ta mata kanser "por bai wòrdu di tèst riba ser humano. Sientífikonan merikano a bin ta traha mas di 20 aña riba e píldora. Segun investigadornan, e investigashon ta mustra ku e píldora por 'destruí' tumornan sin afektá sélulanano sano. Na Merka ta hasiendo investigashon preliminar pa tèst e píldora riba ser humano, Sky News ta informá.

"Nos píldora pa mata kanser ta manera un tormenta di sneu ku ta sera un sentro di aviashon importante i ta para tur vuelo ku ta drenta i sali di avionnan ku ta transportá sélulanano kanseroso", profesor Linda Malkas, kende a desaroyá

e medikamentu nobo den e último dékadan, ta bisa. E píldora ta dirigí na un proteina spesífiko, pcna.


Aunke resultadonan di e promé añanan ta prometedor, te awor e investigashon a demostrá solamente ku AOH1996 por dominá kresementu di tumor den modelonan di sélula i animal. E promé fase di prueba humano ta na kaminda.

E píldora a demostrá di ta efektivu den tratamentu di sélulanano di kanser di pechu, prostat, selebre, ovario, boka di matris, kurpa i pulmon. Anteriormente tabata konsiderá ku no por a influensia Pcna ku niun remedi. PCNA e ta un kofaktór den forma di un renchi di DNA polimerasa. E

ta Forma un sirkulo rònt di e DNA unda tur proteina ta envolví

Si e kanser a desaroyá den un órgano òf tehido, un tumor maligno ta krese

for di un grupo di sélula. Ta yama esaki tumor sólido.



Programanan di Bonaire.tv

TELBO kanal 70

Flamingo TV kanal 23

Djasabra 12 Ougùstùs 2023

12.00 Herensia:	Swinda Francisca Mercera
13.00 Aki Boneiru:	Classical Music Board Bonaire
15.00 BAPA:	Juan Hubert Pikeri
16.00 Herensia:	Willem Leopold Frederik Hendrik Alexander Moize de Chateaux
17.00 Aki Boneiru:	Sigfrido Marchena ,Raymond Bernabela, Orlanito Frans
18.00 Herensia Korsou:	Rignald Anthony (Palé) Vidal
19.00 BAPA:	Josella Chula Martinez
20.00 Aktualidat:	Velli huntu ku Boi
21.00 Aki Boneiru:	Kima Karbon
22.00 Herensia:	Stanley van Putten i Sandry Emanuel
23.00 BAPA:	Johny Leoneta

Djadumingu 13 Ougùstùs 2023

12.00 Herensia Korsou:	Ernest Willems
13.00 Aki Boneiru:	Sigfried Molina
14.00 Herensia Korsou:	George Gibbs
15.30 Puerto Latino:	Luis Zárraga
16.00 Herensia:	Swinda Francisca Mercera
17.00 Aki Boneiru:	Classical Music Board Bonaire
19.00 BAPA:	Juan Hubert Pikeri
20.00 Herensia:	Willem Leopold Frederik Hendrik Alexander Moize de Chateaux
21.00 Aki Boneiru:	Sigfrido Marchena ,Raymond Bernabela, Orlanito Frans
22.00 Herensia Korsou:	Rignald Anthony (Palé) Vidal
23.00 BAPA:	Josella Chula Martinez

Tur mèrdia 12'or ta kuminsá un programashon nobo di 4 ora.

E programashon aki ta ripití pa 24:00.



RENOBASHON DI NOS INTERIOR

I no sea conforme e mundu aki, ma sea transformá pa medio di e renobamentu di boso mente, pa boso por komprobá kiko ta e bon i agradabel i perfekto boluntat di Dios." Romanonan 12:2(BS)

Outo a bira bieu? Hinka den saka nobo. Bentana i portanan di kas a dañá, kambia nan pa nobo di mihó kalidat.

Edat tambe ta subi i esei ta nifiká ku nos tambe ta birando bieu òf nèchi bisá; bira grandi. E kurpa físiko, esta esun eksterior, tin tur klase di doló: kabes ta morde, brasa i pia ta due, preshon i suku ta haltu, peso no ke baha. No ta mihó nos hinka e kurpa den i saka un nobo? Òf kambia e miembronan ku ta duna doló? Si fuera esei tabata posibel!

Nos no por hinka e kurpa den i saka un nobo, ni nos no por kambia nos kurpa eksterior pa un kurpa nobo. Loke si por kambia ta e hende interior, e alma. E ta nos responsabilidat pa poné esaki den bon relashon ku Dios pa dia tras dia e bai renobando. "Pesei nos no ta pèrdè ánimo, ma maske nos hende eksterior ta degenerá, tòg nos hende interior ta wòrdu renobá dia pa dia." 2 Korintionan 4:16

E parti di degenerá por zona kruel, ma ta e realidat ku segun aña ta bai, e kurpa físiko ta degenerá komo resultado di piká.

E miembro prinsipal di e kurpa, ta e alma. E si tin e posibilidat di bai renobando dia pa dia, kada momento di nobo i asina un dia alkansá perfekshon, ku ta bida eterno. Rekonosé ku bo ta un pekadó i aseptá Hesus komo e úniko Salbador di bo alma i lo bo eksperensia e renobashon diario di e hende interior.

Bo a komprobá pa bo mes kaba kiko ta e bon i agradabel i perfekto boluntat di Dios?

Gilda Beukenboom-Sintjago
Produksion PGM

Tempu pa kibra ku tabú riba alimento di pechu

KRALENDIJK – Mes- ter kibra ku e tabú rònt di alimento di pechu na Boneiru,” spesialisista di alimento di pechu Mariëlle Olaya Romero, ta bisa den entrevista ku Marit Severijne di Ret Karibense. E ta ripará ku alimento di pechu no tin e norma mas i duna alimento via pechu públiko ta un tabú. Lo bo mester bai tur kaminda ku bo yu pa dun’é kuminda, pero hendenan ta haña esaki tòg algu.

E luna akí mundialmente ta dediká atenshon na alimento di pechu. Olaya Romero ta organisá un evento pa pidi atenshon pa esaki i interkambiá di eksperensia i idea. “Mas grandi bo yu bira, mas tantu

por haña algu,” e ta ripará a base di storianan ku mamanan na Boneiru.

Segun Olaya Romero, mester kambia algun kos na Boneiru. Na promé lugá, e ta pleita pa mas informashon tokante alimento di pechu na mamanan soltero i dunadónan di ayudo. Pasobra aktualmente lástimamente ainda hopi biá ta duna konseho pa kurashá alimento di pechu. Tambe bou di famia i amigu esaki ta sosodé.

Alimento di pechu na trabou

Tambe gustosamente Olaya Romero ke mira hende muhé haña yudansa pa alimento di pechu i ku dunadónan di trabou bai

informá nan trahadónan tokante nan derecho. Huntu ku esaki ta konta por ehèmpel un espasio adekuá pa pòmp lechi i tempu durante trabou pa pòmp lechi.

“Nunka mi doño di trabou a informá tokante mi derechonan relashoná ku pòmp i duna alimento,” Alicia Xuan- Krijgsman, ta konta. “Danki Dios via kursonan di embaraso mi a siña ku mi tin derecho riba 25 porshento di mi tempu di trabou pa duna kuminda òf pòmp te na momentu ku mi yu ta nuebe luna.”

“Mi dunadó di guia a stimulá esaki, pero e fasilidatnan pa pòmp no tabata tei. Kore bai bin kas a bira tambe un molèster i ta kostá mi hopi plaka. P’esei mi

mes mester tabata kreativo pa fasilidatá mi mes den esaki,” Xuan- Krijgsman ta bisa. “Un di mi kolegan- nan por ehèmpel a kologá un bòrchi ‘mi ta pòmp, no stroba’ i nos a plak esaki na bentana.”

Ilse tambe ta rekonosé esaki. “En realidat no tin suficiente informashon disponibel i no ta kla. Mi dunadó di trabou por ehèmpel ta di abla Spañó, pues informashon tokante derecho na trabou pa loke ta trata pòmp i duna kuminda via pechu, mester ta den mas idioma.”

“Wardando riba mi turno na ofisina di konsulta, mi tabata dunando mi yu lechi,” Dragana ta konta. “Momentu ku mi tabata na turno i a lanta para ku e yu na mi pechu, tòg a puntrá mi pa tapa mi pechu. Mi a respetá esaki, pero e tabata

sí remarkabel.

Dragana seguidamente a haña kòmpliment pasobra ketu bai e ta duna alimento di pechu. “Momentu ku mi a pensa, straño esaki en realidat tòg ta normal.”

Ilse tambe ta rekonosé esaki. “Nan a reakshoná un tiki asombrá ku mi tabata dunando lechi di pechu. Pues no den kombinashon ku alimento via bòter.”

E ofisina di konsulta por ta algu mas positivo tokante alimento di pechu i nan mester sa mas tokante esaki, un mama ku ta preferá keda anónimo ta bisa, pasobra Boneiru ta chikitu. “Te ainda mamanan ta haña tende ku kada tres ora nan mester duna e yu alimento i tin biá mi ta tende tambe ku pa no duna duna e yu kuminda anochi. Realmente no bon konseho pues.”



Seshon di informashon logronan BHRO

KRALENDIJK -- Bonaire Human Rights Organization (BHRO) ta invitá medionan di komunikashon i organisashonnan sosial, gubernamental i no gubernamental, na un seshon informativo ‘BHRO bèk na kas’, logronan di e último 495 dianan pa tur Boneriano den tur sektor, sosial, ekonómiko, polítiko, edukashonal i kultural

E organisashon tin e honor pa informá na media i organisashonnan sosial, gubernamental i no gubernamental, riba e proseso i logronan di Bonaire Human Rights

Organization. Ta informá entre otro riba atmishon komo miembro asosí di CARICOM su Komishon di Reparashon, status spesial konsultativo di konseho sosial i ekonómiko di Nashonnan Uní i BHRO su presentashon na Nashonnan Uní na e foro permanente di hendenan di desendensia Afrikano i mas.

Tambe durante e 495 dianan pafó di Boneiru den Amérika Latino, Área Karibe i Nashonnan Uní, luchando pa derechonan di bonerianonan, konsientisando i buskando solidaridat i último desa-

royo di e status dj e proseso pa pone Boneiru riba lista di teritorionan sin propio gobernashon di Nashonnan Uní.

BHRO ta ekstendé un invitashon tambe na organisashonnan sosial pa ta presente na e seshon informativo, kaminda ta bai kompartí e oportunidatnan i posibilidatnan ku ta disponibel pa organisashonnan di Boneiru na Nashonnan Uní.

E seshon di informashon ta tuma lugá djaluna 21 ougùstus pa 10’or di mainta den sala di konferensia di Captain Don’s Habitat.

Bon pa bo sa

**Bo tabata sa ku turtuga blanku gusta komo yerba di laman. Den nan promé fase di nan bida, turtuga ta komedónan oportunista. Momentu ku nan bira mas grandi, nan kuminda ta kreá mas spesífiko pa un dieta úniko di kada spesie di laman. Turtuga blanku gusta kome riba kama di yerba di laman. Kasimamente nan no tin otro spesie ku nan ta gusta mas. *Thalassia testudinum* yamá tambe yerba di turtuga, ta pasobra turtuga gusta e spesie akí tambe hopi.

Bahia di Lac ta un di e lugánan na Boneiru kaminda hopi turtuga blanku ta kome. Den bahia di Lac tin un total di sinku spesie di yerba di laman, kuater spesie nativo i un spesie invasivo.

Hopi organisashon ta trahando duru pa restorá i protehá kama di yerba di laman den bahia di Lac. Turtuga direktamente lo benefisiá for di e protekshon i restorashon di kamanan di yega di laman na Boneiru.



Den desierto na frontera di Tunesia

Sigur 27 migrante hañá morto

KRALENDIJK/LIBIA – Libia ta informá ku a haña sigur 27 migrante morto for di otro paisnan den Afrika e último dianan den desierto serka di e frontera ku Tunesia. A haña ocho migrante na bida.

Den un deklarashon di e ministerio Libanes di asuntunan interno, ta pará ku a deskubrí e kurpanan sin bida serka di frontera i a manda un tim forénsiko na e área. Fotonan serka di e informe riba Facebook ta

mustra kon timnan médiko Libanes ta trata migrantenan Afrikano. E komishon nashonal di derecho di hende ta sospechá ku trupanen di siguridad di Tunesia ku violensia a obligá e migrantenan pa no krusa frontera i a laga nan atras den desierto sin kuminda i sin awa.

Segun mesun komishon, desde yüli a tur obligá mas di 750 migrante Afrikano di Tunesia fòrsá pa bai Libia.

Dil Europeo

Union Europeo un luna pasá a sera un dil ku Gobièrnu di Tunesia tokante e limitashon di e fluho di migrante pa Union Europeo. Tunesia mester bini ku siguridad di frontera mas stringente en kambio pa invershonnan desde Union Europeo.

Promé Minister demisionario Mark Rutte a bisa ku Union Europeo mester mira riba e siguridad di derecho humano dor di Tunesia.

E derechonan humano akí ketu bai ta bira mas pisá den e pais. Presidente Kais Saied, kende a yega na poder demokrátikamente, a hala tur poder den e pais pe. A hasi Parlamento lam

i hopi polítiko di oposishon, periodista i aktividat, ta será.

Segun Amnesty International, e dil lo okashoná hopi sufrimentu pafó di e fronteranan di Europa.



NILO Trankilo

Awe Nilo Trankilo ta bai kontu bo kon e asuntu di pelamentu tabata bai den añanan sesenta. Tempu ku nos tabata mucha chikí. Ta ku tur sorto di hèrmènt i mashin tabata usa pa pela nos.

Komo mucha nos tabata wòrdu pelá dor di nos tata Alberto (Shon Bubu) Emerenciana mes. No ta tin kuenta di bai Barber-shop di Janshi of Buchi's Barbershop pa pela. Buchi's Barbershop tabata keda na fin di Kaya Emerenciana, parti patras na

kas di Buchi. Eiden Buchi i Julian, dos ruman, mi tionan, tabata pela.

Ta na kas mes tabata pela nos pa spar e sèn. Kòrda ku ta ocho yu Shon Bubu tabatin pa kria i kada dòs plaka tabata kontu.

I kon e pelamentu mes tabata bai e tempu ei? Awèl, mi tin ku bisa sí ku ora di pela yega, kada dos siman asina, ku nos mucha hòmbènan no ta gusta masha, ya ku e mashin di pela, ku ta funshona ku forsa manual i no tabata di korie, pero sí



Pelamentu di ántes

ta e 'voorloper' di e aktual 'tondeuse'. E mashin manual aki ta ranka bo kabei masha hopi mes. Bo kueru di kabei ta keda bon due despues di un pelá.

Mira e mashin manual i esun eléktriko di awendia riba e ilustrashon huntu ku e loke mi ta skirbo aki. E mashin manual ta funshoná ku forsa di bo man i manera un skèr ta keda primié habri i sera i asina e djentenan di e mashin parti ariba i abou ta keda bai i bin i ta kòrta e kabei. Pero na momentu ku e mashin manual no a kòrta e kabei ainda i e man ta pusha e mashin pa dilanti, ku konsekuensia ku e kabei ta wòrdu ranká di bo kueru di kabei i esei ta hasi hopi doló. Tabata kuenta di pone nos sintu riba un stul ku un kaha di batata ariba i pela nos mucha hòmbènan un tras di otro. Esaki pa nos ta sintá na un altura bon pa nos tata por a pela nos. Ta e stulnan di palu den e kasnan di ántes. Esnan rondó asina. E tabata pues pone un kaha di batata di palu i ei riba nos ta sintu i e ta pela nos.

Batata tabata bini ántes

na kaha di palu i no den saku manera awendia. Tabata kuenta di pela nos kabes limpi limpi. Nada nada di kuenta di saka stail. Na kabamentu tabata hunta e kabes ku zeta di koko.

Ora ku kaba pela, pa saka e rant di kabei, mi tata tabata yena e pòm di awa ei ku awa i poko Glacial aden i ta spùit muha e rant di kabei. Despues e ta kue un blet di marka Personna e tempu ei i ta saka e rant nèchi nèchi. E sa usa tambe e nabaha. Segun mi e marka di blet ei, Personna, no ta bini mas.

Tin ora su man ta slep i nos ta haña un kòrtá tambe. Awèl ta kue Shon

Bubu ta kue Glacial pone riba un pida katuna i pone riba e kòrtá i despues e ta pasa un tiki zeta di Canadian ariba.

Anto awó e kos ta bin. Ora ku bo kaba pela, bo tin piki di bo kabènan fo'i suela, pasobra e ta bisa bo ku si bo laga e kabei abou i un chuchubi bai kuné pa traha su neishi, esei lo hasi bo bira loko.

Ku esei ta bèrdat mi no sa, pero komo mucha bo ta haña miedu òf sustu ku bo ta piki tur kabei meimei di e krastèchinan.

Ta asina nos tabata wòrdu pelá pa nos tata Shon Bubu ku su mashin di pela manual.



Impakto Sosial a bishitá Terra Mar Museum

KRALENDIJK -- Djaluna Terra Mar Museum tabatin e honor di yama bon biní na e grupo di komunidad Impakto Sosial di Partido M21.

Mientrastantu ta finalizando e trabounan pa un eksposishon nobo yamá 'Nos Ta', nan a yuda dunando feedback kritiko riba kon pa konektá ku e públiko lokal mihó.

Kompañá pa un rekorido

privá ku hopi humor, Terra Mar Museum ta di akuerdo ku tekstonan den Museo mester ta na Papiamentu tambe banda di Ingles.

Terra Mar Museum ta spera di yama henter komunidad bon biní otro siman na e eksposishon nobo. E eksposishon ta hasí posibel pa Fonds voor Cultuurparticipatie i artista kolaboradó Delno Tromp.



Ora bo yu chikitu ta yega 66 liber di peso, kresementu ta rápido ta kuminsá

BO TABATA SA?

FUHIKUBO

1998 - 2023

Laborando ku dedikashon pa salbargardiá loke ta di Boneiru!

Mundu mester parse shelu

KRALENDIJK — Djaweps 10 di ougùstùs, partido polítiko Demokrat a selebrá nan 69 aña di eksistensia. Atardi 6or, e miembronan di direktiva i simpatisantenan, a bai na e busto di Jul Abraham(†). Aya su bisa nietunan di e yu mas chikitu, a pone krans i despues nan a sigui direkshon pa misa na Antriol. Pader Alphonsus Baak, a ofisiá e selebrashon Eukarístiko. Misa tabata kòrá kòrá, pader ku stola kòrá, sirbidónan ku faha kòrá i lèktòr akólito tambe ku su faha kòrá. Tur esaki, pasobra tabata fiesta di Martin

Lorenzo. Pues Demokrat a sali di bon, un misa kolorido na e koló di partido.

Pader Baak, durante predikashi: “No ta fásil pa hustisia drenta e hende. Ora un partido haña hopi voto, e mester bai di dilanti pueblo. Bos di pueblo ta bos di Dios. Laga bo reino bini na nos. Ta nifiká, ku boluntad di Dios, ta drenta den nos i e ta bai guia nos. Mundu mester parse shelu. Dios ta amor, pues nos tambe ta biba den amor.”

Pader Baak, a konta kon el a kore for di Haiti, pa skapa su bida. “Na Hulanda hopi ta kore pa no drenta

polítika. Un konseho mi tin pa partido Demokrat, purba pa tur hende ta integrá. No separá hende for di otro. Den supermarket mi ta mira ‘voedselbank’. Esei ta un bèrgwensa pa e isla. Polítikonan tin ku boga pa un chèns nobo pa sobreviví. Na final, ta bon pa e isla i pa nos tur. Tur momentu Clark Abraham, ke papia, pasobra e ta bon dokumentá. Mester sakudí hende. Hopi

biaha, despues di elekshon, tin hopi triki. Mi tata tambe tabata polítiko aya na Hulanda. For di dje, mi a siña hustisia. Un kos mi tata a siña mi, ora mi pidi sèn e ta bisa, no ta duna pa nada. Mester tin un bon motibu. Van niets kom niets.”

Na e parti final di misa Pader Baak a bisa: “Mi ta na Boneiru i pader Marc, ta na Kòrsou na Banda Bou. Pader Marc, a bai subi e

seru mas haltu na Kòrsou, seru San Cristoffel. Despues e siguiente dia el a bai landa na e waf pegá ku misa. Aya tin masha hopi turtuga i pader Marc tabata deseá pa landa mei mei di nan. E sei a bai bon, te na momentu ku el a mira un tribon, esei si no tabata masha apresia i pader Marc a sali rápido for di laman. E ta gosando di Banda Bou.”



Demokrat fundá netamente pa e problemanan di awor

Jammer pafó di gobernashon i no por yuda pueblo

KRALENDIJK -Clark Abraham, lider di partido Demokrat a bisa djaweps 10 di ougùstùs, momentu di pone krans na busto di Jul Abraham(†), promé ku a bai misa pa e selebrashon di 69 aña di partido.

“69 aña Partido Demokrat. Dikon Demokrat a lanta, pasobra Jul, tabata den polítiko promé ku esei, pero el a mira

un otro nesesidat. Especialmente na Rincon, nèt dilanti di e busto di Jul Abraham, e kas di famia Anthony, einan e partido a keda fundá. Jul, huntu ku Chiti spiritu Emerenciana i Nechi Chrestiaan. Nan ta e fundadónan mas rekonosé, kara di partido. Nan a mira e nesesidat pa un partido nobo. Un di e logronan remarkabel tabata, Peshun gen-

eral. Dikon tin un busto di Jul, na Rincon. Jul, a fayesé na edat yòn, i siudadanonan na Rincon, a kolekta sèn i asina a yega na konstruí e busto di Jul e tempu aya. Puntra bo mes kiko un polítiko por a hasi den 6 aña. Jul, a drenta polítika na 1951, lanta partido demokrat na 1954 i el a fayesé na 1960. E pueblo ta bisa, Jul a primintí ku si nan

partido e tempu aya bai na mando, nan ta pèrkurá pa peshun general. Hopi hende a bisa e kos ei ta imposibel, promé ku Jul, a fayesé, peshun general a bira realidat na Boneiru. Esaki den un periodo. Awendia nos ta papia di sosial mínimo, problema di pobresa, sierto kos no tin diskushon. Nesesidat básiko di un hende,

no ta kos pa diskutí. 69 aña despues, si bo puntra bo mes dikon partido Demokrat ta fundá, nos ta den mes un bataya di 69 aña pasá. Mirando ku e partido aki no ta den gobernashon, esei ta un lástima. E partido aki ta lantá, pa e problemanan ku tin awe, na bienestar di e komunidad.”



De Maan a selebrá su kumpleaño

Benjamin Nicolaas, konosí pa tur hende komo De Maan, a selebrá su kumpleaño djárason. Su famia i hendenan mas yegá tabata presente pa asina selebrá huntu ku De Maan su kumpleaño.



Ber ta hui den espasio di ekipahe i Boeing 737

BAGDAD – Un Boeing 737 di Iraqi Airways tabata transportá un ber pa Dubai. Durante e buelo e bestia a pensa su propio plan.

Iraqi Airways buelo 123 djabièrnè tabata transportá un karga spesial di Bagdad

pa Dubai. E buelo manera usual a resultá sin problema. Momentu ku e Boeing a yega Union Emirato Árabe i e trahadónan di rampa a kuminsá ku e trabou pa deskargá e avion, a resultá ku e ber tabata kana

lòs den e espasio di karga.

E pasaheronan por a bandoná e avion normal. A dura un poko promé ku por a saka e bestia for di e avion. P'esei a buelo di regreso pa Bagdad a sufri tres ora i mei di retraso.



Boneiru den fin di añanan kuarenta (5)

Pa: Charles Hellmund

Charles Ernst Barend Hellmund, mihó konosí komo Shon Cha, a nase dia 19 di febrüari 1895 na Boneiru. El a muri dia 22 di mart 1952. E tabata kasá ku Maria Carmen Boom. Shon Cha tabata yu di Jules Hellmund, un influente komersiante na kuminsamentu di e siglo pasá na Boneiru i tambe na Kòrsou. Shon Cha tabata komersiante, polítiko, eskritor, i poeta i tabata enbolbí hopi den e bida sosial di Boneiru. Na 1947 el a publiká un relato interesante den e buki 'Oranje en de Zes Parelén'. Den un seri BONEIRANO ta publiká esaki.

Desaroyo sosial

No por nenga ku den diferente aspekto e último 50 aña, tambe riba tereno sosial, a bini mihorashon na Boneiru. Por ehèmpel awor ta dediká mas atenshon na kuido di enfermonan. Sùrnan di Rozendaal a kumpra e kas di Richard Muskus, Villa Jane, pa keda konbertí den un hospital, loke pa e tempu den kua el a tuma luga tabata un mihorashon importante pa e isla.

Masoménos tres aña pasá a konstruí un edifisio di hospital bunita i moderno, ku mas espasio i den kua a instalá tambe un aparato pa saka portret (Röntgen). Ademas ta duna muchanan ku ta bini for di famianan ku ménos rekursu kuminda na skol.

Un organisashon spesial, esta 'De Gouv. Van Slobbe Stichting', ta traha den e espíritu aki, miéntras ku Sùrnan di Roosendaal resiente-

mente a habri un kas pa ansiano.

Awor a bira ku doñonan di trabou ta obligá pa sigurá nan trahadónan kontra desgrasia i enfermedat, miéntras ku tin un ordenansa ku ta regla e ora durante kua negoshinan por keda habrí. E bentahanan moderno di radio-telegrafia, telefonia, iluminashon eléktriko, outo, trùk i oroplanunan ku a bini Boneiru den kurso di añanan ta duna indikashon ku e isla aki ta riba e bon kaminda.

Pronto lo bini tambe un sistema di distribushon di awa. Muchanan riba buriku. Den añanan kuarenta ainda buriku tabata un medio di transporte hopi usá.

Enseñansa

Na kuminsamentu di e siglo aki tabatin solamente un skol públiko na Playa pa mucha hònber i mucha muhé i un skol di sùr, tambe pa ámbos

sekso, na Rincon. Na aña 1914 Fraternan di Tilburg a habri un skol pa mucha hònber na Playa, miéntras ku despues a bini un skol di sùr nobo.

Un dje deseonan ferviente di e poblashon boneriano ta ku pronto por bini un skol pa enseñansa avansá, esta un MULO, riba e isla aki, di manera ku no ta nesario mas pa manda nos muchanan bai studia na Kòrsou, loke finansieramente hopi mayor no por karga.

Kultura i deporte

Baile kompañá pa tambú ta konosí for di antaño na Boneiru. Nan ta kanta kantikanan di dòbel sentido i ta indiká aktonan ku a tuma lugá den komunidad. Te asta Gezaghebber, dòkter, doñonan di plantashi i komersiantenan no ta skapa i nan aktonan tambe ta bira ingrediente di e kantikanan di tambú (bari) aki.

E bailenan aki ta tuma luga den dianan di Pasku i Aña Nobo. Na e momentu aki sporádikamente e bailenan aki ta tuma lugá. Tin tambe 'simadan' ku ta un fiesta di kosecha. Maluso di bebida stèrki no ta eksepsion.

Komo ku mayoria mucha na edat di 18 aña ta bandoná Boneiru, klupnan di deporte no tin un eksistencia stabil riba e isla. Deporte di futbòl a kuminsá ku masha entusiasmo. Diferente klup a lanta den transkurso di añanan, ma despues di algun aña ta disparsé. Klupnan nobo ta lanta, pero nan eksistencia tambe ta poko. Na e momentu aki tin un klup di futbol na Boneiru.

Tambe for di Kòrsou sa bini ekiponan di futbòl pa hunga kontra Boneiru, loke ta lanta un sierto entusiasmo serka e muchanan boneirano. Tin tambe ekiponan di kòrfbal. Pero e klupnan aki tambe tin un bida kortiku.

Pa algun aña kaba tin un klup di tènis ku su propio edifisio, den kua kompleho tin tambe e teater di Playa. Resientemente na Rincon tambe a establese un teater pa drai sini. Esakinan ta duna e pueblo oportunitat pa mira algu di loke ta sosodé den mundu.

Den Playa tin diferente botekin kaminda tin mesanan di bilyart, ku tambe ta un ramo di deporte hopi popular.

Turismo


Ounke ku Boneiru di e tres islanan ABC ta ofresé mas bunitesa di naturalesa, no por papia di industria di turismo. E último tempu aki sinembargo algun persona influente ku tin bon intensionnan pa Boneiru, ta hasiendo intento pa trese personanan ku tin vakansi e isla aki.

Den Playa ya a lanta un par di hotel i ta hür 'weekendhuis'.

Fin

Esaki ta fin di e seri skirbí pa Charles (Shon Cha) Hellmund den e buki 'Oranje en de zes parelen'. Charles Ernst Barend Hellmund a nase dia 19 di febrüari 1895 na Boneiru. El a muri dia 22 di mart 1952. E tabata kasá ku Maria Carmen Boom.

Shon Cha tabata yu di Jules Hellmund, un influente komersiante na kuminsamentu di e siglo pasá na Boneiru i tambe na Kòrsou. Shon Cha tabata komersiante, polítiko, eskritor, i poeta i tabata enbolbí hopi den e bida sosial di Boneiru.



KOLOFÓN
 Editor: Bonaire Communication Services N.V.
 Kaya Irlanda 12,
 Tel. 717-8482
 Redakshon: extrabon@gmail.com
 aviso: avisobon@gmail.com
 Wèpsait: www.extraboneiru.com
 Facebook: Extra Boneiru

Direktor
 Shirley Martis
 785-3824
 796-3824

Partner na Aruba
 Awe Mainta
Partner na Kòrsou
 Extra
Partner na Boneiru
 Live99

Redakshon
 Papi Antoin
 Nathaly
 Evertsz-Ipcedencia
 Velli Gijsbertha
 Edson Pietersz
 Ibi Piar (deporte)

Layout
 Maya Beaumont

Konsehero:
 Bòi Antoin
 786-6818
Aviso
 avisobon@gmail.com

Doktrina Sosial di Iglesia den famia (1e Parti)

Outor: Francisco de Paula Cardona Lira

Bon nos sa ku famia ta e skol kaminda yunan ta siña na biba den sosiedat, kaminda nan ta desaroyá virtutnan ku permití nan di ser mihó personanan, pa kombibí komo personanan den nan komunidad. Famia kristian mester ta e lugá kaminda yunan ta siña na biba komo kristian, kaminda ta desaroyá virtutnan kristian i pa biba kristianamente den komunidad. Si nan no siña hasié na kas, ta unda na lo hasié?

Pa e rason aki, Iglesia ta invitá nos pa nos hasi esfuerso p'asina ku nos yunan ta siña realmente na biba komo kristian den kas: pa nan sea respetuoso pa otronan, pa nan kolaborá ku alegría pa e bon di e famia, pa nan kompartí ku generosidat loke nan tin i loke nan ta, pa nan trata tur nan semehante kristianamente. Laga nos rekordá ku nos tur persona ta kreá na imágen i semehansa di Dios. Ta p'esei, e trato entre tur hende mester ta trato di rumannan, rumanan den Dios.

Iglesia ta siña nos atraves

di su doktrina sosial. Kier men, atraves di e siñansanan ku lo yuda nos biba komo berdadero kristian: “Mira kon nan ta stima!”.

Si nos ta biba e siñansanan i nos ta yuda p'asina ku nos yunan ta biba nan, nos lo ta kolaborando den konstruksion di sivilisashon di amor, kaminda ta biba e mandamentu mas importante de Dios: “Stima otro manera Ami a stima boso”.

Prinsipio di e dignidat di e persona humano

E promé i mas importante di tur ta esaki:

Rekonosé, respetá i un biba ku otro pasobra nos tin un dignidat inmenso, pues nos tur ta yunan di Dios, kreá na su imágen i semehansa.

Nos tur ser humano ta kompartí e dignidat aki. Nos tur meresé ser respetá. Akaso un persona tiende derecho di ofendé e otro? Señor ta bisa nos: “Stima otro manera Ami a stima boso Dikon? Pasobra E sa ku nos tur ta su

yunan. Por lo tantu, rèspèt den e trato entre un i otro tin di ser bibá dia pa dia, den e detayenan di kombibensia familiar i sosial:

- Respetá bo pareha, maske e ta pensa diferente.
- Respetá bo yunan, maske nan ta hasi bo nervioso i ta terko.
- Respetá bo mayornan, maske e ta kosta bo trabou.
- Respetá bo suegronan, pues nan tambe ta persona.
- Respetá tur persona ku ta sirbi bo: den tienda, e shofùr di bús, e polis, e dòkter, e maestro di skol.
- Respetá esnan ku ta ofendé bo, pues Señor a bisa nos: “Stima bo enemigunan”.

Por tantu, tur kristian mester respetá dignidat di tur i kada un di e personanan ku ta biba rondó di dje, kier men, su próhimo. Un berdadero kristian lo ta, esun, apesar di ta rabiá, kansá, enfermo, fadó o rabiá, ta trata otronan respetuosamente, sin ofendé i heridá nan.

Algun pasashi ku ta papia di dignidat di e persona:

Génesis 1, 26-31: “Laga nos ban traha hende awor na nos imáhen i semehansa”

Mateo 25, 31-45: “Tur kos ku boso a hasi pa un di e rumannan di ménos importansia aki di Mi, boso a hasié pa Mi”



Ora mi bisa “mi ta un kristian”

Ora mi bisa “mi ta un kristian”, Mi no ta gritando ku “Ami ta biba limpi”. Mi ta bisa na bos abou “Mi tabata pèrdí, pero awor mi a ser haña i pordoná”.

Ora mi bisa “mi ta un kristian”, Mi no ta papiando di esaki ku orguyo. Mi ta konfesando ku ami ta trompeká i ku mi tin mester di Kristu pa ser mi guia.

Ora mi bisa “mi ta un kristian”, Mi no ta purbando di ta fuerte. Mi ta profesando ku mi ta debil i mi mester di Su forsa pa sigui padilanti.

Ora mi bisa “mi ta un kristian”, Mi no ta buya di éksito. Mi ta atmití ku Ami a faya i mester di Dios pa limpia mi desórden.

Ora mi bisa “mi ta un kristian”, Mi no ta pretendé di ta perfekto. Mi defektonan ta demasiado visibel, pero DIOS ta kere ku mi tin balor.

Ora mi bisa “mi ta un kristian”, te ainda mi ta sinti e stek di doló. Mi tin mi parti di pena, ta p'esei mi ta invoká Su nòmber.

Ora mi bisa “mi ta un kristian”, Mi no ta mas santu ku Abo, Mi ta un simpel pekador ku di un forma o otro a risibí e grasía di Dios!

Tin un Evangelio pa kristiannan di segundo klase?

Outor: Pader Fernando Pascual LC

E predikashon di Kristu tabata kòrta mes, manera spada di dòbel banda. Su palabra tabata simplemente “sí, sí, no, no”, i nada mas. Ta p'esei El a pidi un heroísmo ku a sorprendé den su tempu i ku ta sorprendé den e di nos.

Den okashonnan ta surgi, sin embargo, bosnan ku ta insinuá i ta promové un sorto di kristianismo di segundo klase. Nan ta komentá ku ta tur hende ta yamá na ser héroe, ku no semper por hasi lo mihó, ku den okashonnan tin ku kontentá bo mes ku un kaminda mei mei, ku ta eksistí kamindanan ekstremo den kua ta apliká e doktrina kristian lo ta eksesivo...

E moda di papia aki ta suponé, konsiente òf inkonsientemente, ku lo tin un Evangelio pa kristiannan di promé klase (e

héroenan, esnan ku si por), i otro Evangelio pa kristiannan di segundo klase.

En realidat, tin únika mente un Evangelio. Eksigente i maravioso. Kla i presis. Yen di forsa di Dios ku ta grasía, poder, misericòrdia, humildat, manse dumbre.

Buska otro Evangelio, proponé adaptashonnan pa kasonan difísil, lo nifiká hasi e krus di Kristu bashí i pensa segun mundu. E palabranan di san Pablo ta bal pa tur kristian:

”Pasobra Kristu no a manda mi pa mi batisá hende, ma pa prediká e bon palabra, sin usa sabiduria humano ku su papiá bunita, pa Kristu su morto riba krus pèrdè poder. Pasobra e mensahe tokante Kristu su morto na krus ta kos di loko pa esnan ku ta bai pèrdí, ma pa nos ku a keda

salbá, e ta poder di Dios.” (1Kor 1,17 18).

Sí: nos ku a batisá ta konta ku e forsa di Dios for di ora ku Kristu a duna su sanger pa nos. Ta p'esei nos por tur kos (cf. Flp 4,13), inkluso loke ta parse heroiko. Pasobra no ta basta su grasía, pasobra e forsa ta manifestá den e debilidat (cf. 2Kor 12,9), pasobra den situashonnan ku ta parse imposibel nos tur por haña den Señor un kaminda di speransa.

No ta eksistí un Evangelio pa kristiannan di segundo klase, ni ta resultá imposibel biba e mandamentunan. Dios ta ofresé nos tur su Amor. For di e forsa di e Krus, kualkier ser humano por kibra ku situashonnan maha difísil di piká i kuminsá na biba segun e heroísmo maravioso di fe, di speransa i di karidat.

Invitashon pa Nobena, Misa i Fiesta na honor di SANTA CLARA di ASIS na misa Santa Famia.

Dianan 2 - 11 ougùstus 2023

Nobena:

Djarason 2 ougùstus. 6 or atardi.
Djaweps 3 ougùstus 6 or atardi.

Djabièrnè 4 ougùstus i Djasabra 5 ougùstus 6 or, S.S. di Misa 7 or.

Djadumingu 6 ougùstus, orashon ta 8 or di mainta sigui pa S. S. di Misa 9 or.

Djaluna 7 ougùstus 6 or atardi.

Durante di Triduo (despues di orashon) tin S.S. di Misa 7 or anochi:

Djars 8 ougùstus
Djarason 9 ougùstus
Djaweps 10 ougùstus



Durante nobena ta pidi debotonan pa asistí e dianan ku tin S. S. di Misa.

Djabièrnè 11 di ougùstus, Misa di fiesta na honor di Santa. Clara di Asis 7 or anochi.

Nos pidi Dios pé bendishoná nos i pa nos deboshon sigui krese.



HULANDA

Despues di eksploshon

Parke di fakansi sigur ainda un siman será

HINDELOOPEN – E parke di fakansi na Hinde-loopen kaminda e siman akí tabatin un eksploshon, ta keda será sigur ainda un siman. Esaki manehadó di e parke, EuroParcs, a informá Omrop Fryslân. Desde djárason e parke ta sera despues ku un eksploshon a destruí un kabaña. E kabaña di fakansi tabata nobo i no

habitá. Un bisña a resultá heridá. Mesun dia el a sali for di hospital i despues di sirkunstansianan ta bayendo bon kuné, bosero di EuroParcs, Yvonne Damhoff, a bisa. Entre tantu a duna e tereno liber, pero ainda mester limpia hopi promé ku vakashonistanan ta bon biní. “Bo por imaginá ku dor di e impakto hopi ma-

terial a resultá tur kaminda riba e tereno. E kabañanan den besindario tambe a risibí daño parti pafó, tambe ta chèk e otro kabañanan,” segun bosero Damhoff.

E orígen di e eksploshon ainda no ta konosí i reshèr-she tékniko ta hasiendo e

investigashon. E parke ta sali for di e punto di bista ku ta trata di un insidente. Tòg ta tuma e seguridat na bista i ta habri te despues ku por garantisá e seguridat, segun e bosero.

Na momentu di e eksploshon tabata un 20 te

30 kabaña asina riba e tereno habitá. Huéspednan ku a reservá un kabaña pa otro siman, por keda na un otro parke. “Ta temporada haltu, pero ta na e momentu akí ta bayendo bon, Damhoff. Hendenan tin kompreshon pa e situashon.



Fugitivo ku a tira dos hòmer mata detené

BERGEN OP ZOOM – Christo H. di 42 aña di Bergen op Zoom, kende desde 2015 ta keda buská relashoná ku un kaso di tiroteo, a keda detené djárason anochi na Maroko. Na 2018 a sentensíá H. na 12 aña di prizòn pa tira dos hòmer mata durante un fiesta di mucha na Bergen op Zoom.

H. a tira e dos hòmer nan di aserka durante un pleitu entre mucha den e parke di hunga. Segun testigunan, e pleitu a originá entre yu muhé di e víktimanan i un mucha hòmer di e bario.

Parse ku e pleitu a kaba te na momentu ku H., kende konosé e mucha, a regresá ku un arma di kandela i a tira e dos víktimanan. Ámbos víktima a muri, pero desde di e tempu ei no tabata sa paradero di H.

E hòmer sentensíá a resultá riba e isla di detekshon nashonal, un lista ku e kriminalnan mas buská. Ministerio Públiko a pone 10 mil euro pa e tep di oro ku por kondusí na detekshon di e hòmer, pero no mester entregá e sèn, pasobra a haña e hòmer, Omroep Brabant ta skirbi.



For di Fremantle Highway

Ainda no tin plan konkreto pa deskargá e outonan

EEMSHAVEN – Ainda no ta kla kiko ta bai sosodé ku e outonan ku e barku Fremantle Highway tabata transportá. No por deskargá tur e mas di 2700 outonan kimá.

Boskalis ta bisa ku un parti di e dèknan a smèlt ku e outonan. E dèknan ta seriamente dañá i no por

subi nan, hòmer tòp di Boskalis, Peter Berdowski, ta bisa.

Kiko ta bai pasa ku e miles di outo ku ta riba e dèknan mas abou, ainda no ta kla. Segun Berdowski parse ku e outonan akí ainda ta bon. Ekspertonan di fabrikantenan di outo ta na kaminda pa mira ku tin

outo ku por deskargá.

For di inspekshon anteriormente, ya a resultá ku e dèknan ariba di e barku ta esnan ku a haña mas daño dor di e kayente ekstremo. E kuater dèknan mas abou ainda parse den kondishonal rasonabel. E kamber di mashin di e barku tambe ainda ta intakto.



Popularidat ta relativo
P'esei un propio estilo
No solamente pa ta eksitoso
Sino sigur mas balioso

BròKèS 93.5 FM

pokopoko pero sigur mas i mas hende ta ...

Skuch'è

Telefon/ WhatsApp +599 701 0935

www.radio935bonaire.com



KORSOU

Hopi entusiasmo pa kampaña 'Back to school'

WILLEMSTAD -- Djárason mèrdia restorantnan di Hucor Holding N.V. a hasi entrega di premionan di e kampaña 'Back to school'. Durante shete siman mayornan por a kumpra na KFC, Pizza Hut i Subway i skibi e nòmber, fam i number di telefòn di nan yu, nietu, ihá, subrina òf subrino, tras di e bon.

Di akuerdo ku Surella Veeris di Hucor Holding, e

kampaña tabata aporte na komunidad i na mes momentu un oportunidat pa yama danki na tur famia ku a bishitá e restorantnan KFC, Pizza Hut i Subway, durante fakansi.

Djaluna último a saka e ganadornan i ya pa djárason tur mucha a risibí nan premio. Total saka 6 ganadó, dos pa kada restorant i muchanan no mester tin miedu mas ma kontinuá

gosando.

E premionan tabata realmente atraktivo, kada pakete a konsistí di 5 unifòrm polo ku logo di nan skol ariba, a sèt di gym, inkluyendo polo i shòrt ku nan logo di skol, 3 jeans, 1 par di kèts, 1 tas di lomba i 1

laptop di Tapirama i tambe wifi inkluí pa un aña di Digicel. Ta importante pa nos pa hasi un tour di nos komunidad den nos espasio finansiero. KFC, Pizza Hut i Subway, ke a yuda prinsipalmente esnan ku tin'é un poko mas difísil i

a logra esaki ku e kampaña dinámiko i ku a resultá masha eksitoso. Asina por mensioná ku hopi kliente a skirbi nòmber di nan bisiña, yu di kolega, òf otro muchanan ku ta nana familiar i di e manera akí yuda un otro, Veeris a bisa.



Royal Caribbean ta adaptá ruta kanal di Panamá i ta bai Aruba i Kòrsou

WILLEMSTAD -- E kompania krusero Royal Caribbean Cruise Lines a disidí pa kambia den 2024 un krusero, ku tabata bishitá Kanal di Panamá, den un krusero den Karibe ku

lo bishitá Aruba. E bishita èkstra na Aruba i Kòrsou anteriormente, no tabata riba e programa. Ta trata di e barku krusero Rhapsody of the Seas. A pone tur pasahero ku a buk kaba na

altura.

E plan original di Rhapsody of the Seas tabata pa ofresé un krusero di 7 dia, ku ta kuminsá i terminá na Panamá, pasando den Kanal di Panamá. Esaki ta-

bata un aserkamentu nobo pa ofresé un krusero ku tabata hopi pidí sin ku e mester a dura dos siman.

No a duna un motibu spesífiko pakiko a anulá e idea aki. Un meil di e kompania ta informá solamente ku esaki ta pa mehorá e eksperensia di e turista.

A adaptá e skema di biahe pa e krusero entrante 16 di mart 2024 pa un krusero di 7 dia den e parti sùit di

Karibe. E barku di 264 meter largu, ku por karga 2500 pasahero i 765 miembro di tripulante, lo pasa awor Aruba i Kòrsou i ademas lo para na Cartagena, Colombia. Pasaheronan ku a buk delantá tin tempu te fin di ougùstus pa disidí sí nan ta bai e krusero ku ta enserá Aruba i Kòrsou, òf sí nan ta kanselá e biahe, pasobra nan deseo original tabata pa wak Kanal di Panamá.

Frakshon di PAR

'Ban dialogá i stòp di kibra konfiansa den kuido.

WILLEMSTAD-- Frakshon di PAR ta preokupá pa e deklarashonnan públiko di Minister di Salubridat tokante e kalidat di kuido na CMC. Deklarashonnan di Minister por dañá e konfiansa den kuido públiko i den e profeshonalismo di trahadónan di kuido. Frakshon di PAR ta urgí Minister pa enfoká riba bienestar di pashènt i trahadónan di kuido pa medio di diálogo, pa asina garantisá trankilidad i kalidat di kuido ku komunidad ta meresé.

Un famia den doló ku a pèrdè un ser kerí, por tin pregunta i asta opinion skèrpi riba trato di nan ser kerí i ta komprendibel ku nan ta buska nan derechi

via di instansianan manera 'Medisch Tuchtcollege', departamento inspeksion i salubridat públiko i Korte di Hustisia.

Sinembargo, pa un Minister, responsabel pa Salú Públiko, kuestioná públikamente kalidat di trabou di enfermeronan i trahadónan profeshonal den kuido, sin ni buska informashon korekto, ta tacha públikamente konfiansa den kuido públiko i den e profeshonalismo di trahadónan den kuido.

Ta bira pió, ora e Minister sostené públikamente deklarashonnan ku ta kuestioná e kuido ku profeshonalnan a duna den periodo di COVID-19, insinuando

ku hendenan a fayeré pa otro motibu (falta di kuido) i ku tin ku bini un investigashon.

Ku otro palabra segun e minister profeshonalnan lokal a manipulá ku informashon òf a duna kuido robes na pashèntnan.

Trahadónan den kuido ta traha diariamente bou di un preshon enorme. Huntu ku esaki, e tenshon ku tin públikamente entre Gobièrnu i CMC a afektá e ambiente di trabou den CMC mas tantu. Tarea di un Minister di Salubridat ta, pa krea un ambiente den kua e profeshonal den kuido, por ehersé su trabou ku mente mas trankil posibel, p'e duna e pashènt e kuido ku e meresé.



ARUBA

Chauffeur ta bandona auto banda di lama y na pia a huy pa polis

ORANJESTAD -- Diahuebs den oranan di marduga durante patruya, Polis di Noord, ta mira un Chevrolet Aveo sospechoso y ta duna e chauffeur un señal pa para. E chauffeur di e auto no ta respeta e ordo di polis y ta primi gasolin pa asina huy di e polisnan.

Mesora polis ta sigui e auto, bou sirena y cu zwaailicht nan ta bay su tras. E chauffeur a bay direccion panort, paso dilanti di Marriott Resort bay

noord y despues a lora den e caminda panort di Ritz Carlton, direccion di lama na altura di Fisherman's Hut, hopi cerca di lama, e chauffeur y e ocupante a baha core bay direccion di e hotelnan.

Door di e scuridad polisnan a perde e dos personanan aki for di bista. No a keda polis nada otro cu confisca e auto y asina warda pa mira ken lo bin reclama e auto aki na Warda di Polis.



Dos detencion y un homber herida despues di pelea formal

ORANJESTAD -- Diaranson den oranan di atardi algun unidad policial mester a pura yega Mangel Halto o sea altura di e bar cu tin eynan. Informacionnan tawata keda di un pelea formal, cu a bay te ariba caminda. Dos homber

pa un of otro motibo lo a bringa cu 1 homber.

E homber a ricibi bastante golpi di e dosnan. Na yegada di polis e victima a conta agentenan su version di locual a sosode, esta cu e dos homber a dun'e un bati basta bon. Debi na e heri-

danan tawata necesario pidi pa un ambulance.

Na yegada di e ambulance e Paramediconan mesora a bay atende cu e

homber y a dun'e e asistencia medico necesario e momento eynan. Pa locual ta e dos agresornan, ambos a wordo deteni y transporta

pa warda di polis.

Polisnan a confisca un cuchiu cu a wordo haya den un Hyundai Accent staciona eybanda.



Massive brassband ta pone Aruba su nomber riba tarima internacional

ORANJESTAD - Durante e siman di Juli 28 pa Augustus 7, a tuma luga na Medellin, e famoso evento anual "Feria de las Flores", na unda a participa sr. Roderich Lopez cu su grupo di Massive Brassband Int. Despues cu na 2022, e grupo aki a pone Aruba su nomber riba tarima internacional, tocando den parada na Magic Kingdom na Orlando Florida, a bay Hulanda pa participa na zomer carnaval, awor a haya e oportunidad pa par-

ticipa den e gran evento aki na Medellin. "Feria de las Flores" ta un evento cu a cuminsa na 1957 como algo chikito, pero awendia ta un di e festivalnan na Medellin, mas bishita pa turistanan.

Prome Minister Evelyn Wever-Croes a expresa di ta sumamente orguyoso di sr. Lopez cu su grupo Massive Brassband Int, cu na mas di un ocasion, a sa di pone Aruba su nomber bria internacionalmente. E orguyo cu nan ta carga di ta

Arubiano, y ta expresa esaki den cada presentacion, ta di admira. Ta notabel cu tur participante di Massive Brassband Int tin un pasion y amor grandi pa loke ta e musica di Asambeho, y sa di uza esaki pa representa nan isla stima dignamente.

Durante nan bishita na Medellin, sr Lopez hunto cu sr. Hessen a ricibi di señora Silvana Andrea, cu ta secretaria di Minister di Cultura, un bunita reconocimiento pa nan presentacion impactante. Esaki

sigur ta un orguyo grandi pa nan como representantenan di e grupo di Asambeho, pero tambe pa tur ciudadano di pais Aruba. E reconocimiento aki ta habri posibilidadnan entre Aruba y Colombia pa cu arte den su totalidad.

"Masha pabien na sr Roderich Lopez y su grupo di Asambeho, Massive Brassband Int. cu e bunita presentacion na Medellin. Aruba ta orguyoso di boso, y ta gradici boso pa promociona e dushi baranca

aki na un manera diferente. Tur e logronan aki di sr Lopez y su grupo, ta mustra nos, cu soñonan por bira realidad, si bo pone tur bo esfuerzo, pasion y dedicacion den nan. Esaki sigur ta loke sr. Lopez a haci pa logra e soño grandi di participa cu su banda na varios eventonan importante, rond mundo. E ta yenami di orguyo pa sa cu Aruba ta conta cu cuidadanonan di e caliber aki" Prome Minister a expresa.

STATIA/SABA/ST. MAARTEN

Tas ku material di skol pa studiantenan den nesesidat

PHILIPSBURG – Den un kolaborashon remarkabel di komunidad i kom-pashon, Minister di Hustisia, Anna Richardson, huntu ku Tzu Chi Foundation, a ekstendé un man di yudansa na studiantenan realmente den nesesidat ku tas i material di skol.

E iniciativa a bini for di un yamada di New Generation Foundation pa Minister Richardson. Den un karta titulé ‘Un gritu pa yudansa’, presidente Esther Blackman-St. Luce, a kompartí e nesesidat urgente pa asistí muchanan i hubentut ku ta den nesesidat ku materialnan di skol esensial.

Un investigashon kon-dusí na Now Generation Foundation dia promé di ougùstùs, a revelá e reali-

dat. Mas di 70 studiante a keda sin e hèrmèntnan básiko pa inisio di e aña eskolar ku a kuminsá 7 di ougùstùs.

Momentu ku Blackman-St. Luce a risibí e resultado, el a ekspresá su sentido preokupashon i a kompartí su esfuersonan ku otro organisashonnan pa pidi asistencia di negoshi i kompanianan. Apesar di su esfuerso proaktivo, dia 2 di ougùstùs ainda e organisashon no a risibí reakshon di e komunidad empresarial. Mirando e situashon urgente, e fundashon a aserká Minister Richardson pa su ayudo.

Den reakshon di e yamada pa akshon, Minister Richardson a pone su staf den akshon i ku esfuersonan kolektivo e ministerio

a drenta direktamente den kontakto ku Tzu Chi Foundation.

Rekonosiendo e urgensia di e situashon, Tzu Chi Foundation, a drenta akshon. Nan reakshon atmirabel a kondusí den e pro-

vishon di mas di shen tas di skol, kada unu yená ku e materialnan esensial di skol.

Den un gesto di unidat, dia 6 di ougùstùs Tzu Chi Foundation a invitá Minister Richardson pa atendé un

evento. Durante e evento e minister a risibí e donashon generoso di tas i materialnan di skol, kla ta distribuina e studiantenan identifiká dor di Now Generation Foundation.



Promé Minister a bishitá archivo

PHILIPSBURG – Promé Minister i Minister di Asuntunan General, Silvera Jacobs, a bishitá e archivonan di Departamentu Suministrashon di Informashon, DIV, ku ta kuida

dokumentonan históriko.

Esaki ta un departamentu ku ta tene kuido kuido di e historia di e isla dor di mantené nan limpi, kontrolá pa klima i medioambiente.

Miéntas ku aktualmente ta realisando proyektonan di digitalisashon a base di

Gobièrnu, e promé minister ta konsiente di e importancia di e ròl importante ku

e trahadónan akí ta hunga den preservashon di e historia físiko di Sint Maarten.



Plan fakansi di Wedoe a finalisá

E plan di fakansi di Wedoe a yega su fin. Durante tres siman e muchanan a gosa di e plan di fakansi. E organisadónan ta gradisí mayornan pa e konfiansa. E hasié ku hopi amor i kariño pa e muchanan. Danki na Flower Garden, Kooyman, Kas di Kuido, Luciano, Pizzeria El Punto i Ambulans, pa e guia i e pasenshi ku e muchanan.



Kabai di awa

Kurpa di kabai di awa ta furá ku un kaska duru. di moda ku e por move solamente pa medio di su ala di lomba i pechu. Konsekuensia ta ku e no por landa lihé. Ioke ta hasié un presa fásil pa su enemigunan. Komo protekshon e tin un bon koló di kamuflahe ku ta mas o ménos mes koló ku e vèltnan di lima kaminda e ta pasa mayor parti di tempu. E ta lora su rabu muskulá rònt di pida lima i asina e ta sinta trankil di dje warda animalitu chikí pasa den e koriekte di awa pa e kome nan.

Den época di prokreashon, e kabai di awa machu ta fertilisá webunan di e muhé. Despues algu kurioso ta sosodé, e machu ta brui e webunan den un saku manera un ploi ku e tin na su barika. Segun e webunan ta desaroyá, e ploi ta parse komo si fuera e machu ta na estado. Ora ta nan tempu, e kriaturanan ta sali for di e saku.

lamentablemente industria di turismo ta kue kabai di awa i seka nan pa bende komo suvenir. Pa e motibu akí diferente sorto di kabai di awa ta aparesé riba e lista di animalnan ku ta kore peliger di desaparesé pa semper.

Riba e potrèt un kabai di awa meimei di e takinan di un gorgon..

fuate/foto:
bart de boer



**BIDA
DEN
LAMAMAN**



**OFFICIAL
STORE**



**HIGH BACK
CHAIR** **\$169**



**COMPUTER DESK
W/ WHITE BOARD** **\$319**



HP ALL-IN-ONE
\$645



**COMPUTER
DESK** **\$89**



**Back
+0
School**

City Shop

Smart shopping ▶ Better living

 Kaya International #36
 +599 717.36.66

 www.cityshopbonaire.com
 info@cityshopbonaire.com

 City Shop Bonaire
 +599 700.64.42